

第三十七册

明倫彙編
氏族典

杜姓部	魯伍古姓部	武祖姓部	庾堵姓部	浦輔虎扈苦五午	迂件土甫府姓部	普莽鄔萬羽禹宇	主豎補戶杜規愈	楮鹵取組姓鼓姥諸	米禰禮邸洗璽且姓	舛澧諸姓部	解假買哈迺姓楷駭諸	姓隗海宰采亥載
(卷)	四三	四四	四五	四六	四七			四八	四九			


每需改鬼在揣姓	待毒諸姓部	尹姓部	閔阻盡闕姓軫允諸姓	惲隱錦姓近謹諸姓部	阮罔苑宛姓部	付蹇晏偃罕本反	烜浼遠匿姓緩混諸姓	部	管滿散坎宣短姓坦	般諸姓簡棧產姓眼板	諸姓部	蹇典雋單展善剪	淺郢卷免勉顯亮	姓扁躓諸姓部	趙姓部
(卷)	四〇	四三	四三	四三	四三	四三	四四		四四	四五			四六	四六	四七

古今圖書集成

中華書局影印

古今圖書集成

中華書局影印



欽定古今圖書集成明倫彙編氏族典

第四百十三卷目錄

杜姓部列傳三

金

杜時昇

元

杜豐

杜瑛

杜處逸

杜佑

杜和

明

杜仁傑

杜貫道

杜智

杜奇

杜銘

杜榮

杜璋

杜鸞

杜輅

杜桐

杜文煥

杜三策

杜邦舉

杜姓部藝文一

杜氏祠譜序



杜姓部藝文二 詩
贈韋七贊善

杜姓部紀事

杜姓部雜錄

唐杜甫

氏族典第四百十三卷

杜姓部列傳三

金

杜時昇

按金史杜時昇傳時昇字進之霸州信安人博學知天文不肯仕進承安泰和間宰相數薦時昇可大用是時風俗侈靡紀綱大壞時昇乃南渡河隱居嵩洛山中從學者甚衆正大末卒

元

杜豐

按元史杜豐傳豐字唐臣汾州西河人父珪以積德好施鄉稱善人豐少倜儻通兵法仕金爲平遙義軍謀克太祖取太原豐率所部來降授兵馬都提控以功陞征行元帥左監軍金人南遁遂以豐守河北壬午授龍虎衛上將軍乙未陞沁州長官在沁十餘年輕徭薄賦勸課農桑民以富足丁未請老丙辰疾卒於家子三人思明思忠思敬思敬由平陽路同知累陞中書左丞致仕卒諡文定

杜潛之

按萬姓統譜潛之字若川伯高之孫明春秋領鄉貢宋易世後感激自悼矯行晦迹寄食西峯僧寺以終

杜瑛

按元史杜瑛傳瑛字文玉其先霸州信安人金亡瑛避地河南緱氏山中間關轉徙教授汾晉間中書粘合珪開府爲相瑛赴其聘遂家焉中統初詔徵不就左丞張文謙宣撫河北奏爲提舉學校官又辭杜門著書優游道藝以終其身子處立處愿天曆中追諡文獻

杜本

按元史杜本傳本字伯原其先居京兆後徙清江本博學善屬文江浙行省忽剌木得其所上救荒策大奇之力薦於武宗嘗被召至京師未幾歸隱武夷山中文宗在江南時聞其名及即位以幣徵之不起至正三年右丞相脫脫以隱士薦召爲翰林待制趣之行至杭州稱疾固辭本湛靜寡欲無疾言遜色與人交九篤於義平居書冊未嘗釋手學者稱爲清碧先生至正十年卒

杜處逸

按尚友錄處逸號道堅又號南谷子采石人年十四得異疾師葛蒙菴入茅山作道士住邑之許簞山昇元觀皇慶間授隆道冲真崇正真人創運元觀作覽古樓聚書萬卷後又住宗陽宮微疾忽爆然有聲而逝

杜敏

按萬姓統譜敏漢嘉人其祖因避亂自蜀至公安因

家焉兄弟六人好學不倦俱以儒業顯敏仕元為著作郎歐陽元贊其像

杜佑

按萬姓統譜佑邳州人河南行省署為三义水馬站提領父成病於家佑忽心驚舉體沾汗即棄職歸父病始三日遂禱求代且嘗糞以驗疾及父卒廬墓盡哀有馴兔之瑞

杜溥

按萬姓統譜溥嘉興路總管廉正仁厚勸課農桑除民疾苦尤以興學為務教化大行

杜和

按萬姓統譜和字彥謙歷山人至正庚寅知瑞安州事性明敏介潔遇事不苟為政不尚虛名不畏強禦於凡庶事井井有條至正辛卯方國珍入寇和躬率民格戰賊遂退州民德之

明

杜仁傑

按廣東通志仁傑濟南人才宏學博累徵不起其子元素任福建閩海道廉訪使以子貴贈翰林承旨資善大夫諡曰文穆

杜環

按名山藏本行記環金陵人本廬陵人父一元游宦江東遂家焉環好學工書國初被薦除學錄太祖善其書尋入侍春坊大為皇太子所眷環為人謹飭重然諾好周人急仕終太常丞

杜貫道

按萬姓統譜貫道山陰人洪武中知休寧縣政事文

章邑人稱頌其後知縣周德威劉紹先繼之皆有善政

杜博聞

按萬姓統譜博聞字景預陵川人以明經為令果斷有為嘗以公勤廉儉四字銘座右以自警

杜智

按萬姓統譜智字仲才蕪湖人儀幹魁梧性敏嗜學洪武間任湖廣隨州知州有治聲以不忍峻征遭稅時例當謫戍廷臣知其為民誣服乃具明其廉明政績以聞詔乘傳入見陞北平知府未幾陞陝西左布政使丁內艱服闋改河南左布政使官至右都御史致仕卒賜葬祭

杜瓊

按名山藏本土記瓊吳人生一月而孤母育教之長父名玉終身不言玉也嘗刲股已母疾後求賢詔下有司輒以瓊應皆辭不就瓊介特有守不為矯異隱居城西其東有原學者稱東原先生卒諡之曰淵孝

杜奇

按順天府志奇北平人靖難兵初起欲廣置羽翼令舉賢良方正有司以名上奇極諫當守臣節王怒立斬之並族其家

杜寧

按萬姓統譜寧字宗謐天台人宣德丁未進士第二歷禮部侍郎

杜銘

按四川總志銘金堂人正統進士性孝友與人誠信能決大事辨疑獄位至司寇歷五朝忠勤如一功成

身退可謂完人

杜謙

按萬姓統譜謙字益之昌黎人早失恃事繼母甚謹不拂父意時以孝狀元稱之比長舉景泰甲戌進士官工部主事轉儀曹正郎出參兩浙大政歷方伯入尹京兆亞卿冬官廉能經濟所至有聲

杜榮

按萬姓統譜榮字景華蘭州人天順己卯舉人性度坦夷威儀純雅任山西朔州知州值歲荒歉加意賑恤招集流亡民用稍蘇即崇學校作與人才公廉明恕吏畏民懷致政家居足跡不入公門

杜述

按萬姓統譜述慈利知縣處己廉介賦役均平德化一方嘗入蠻谿采官木夷獠爭來迎勞奉之如己親焉

杜璋

按萬姓統譜璋雞澤人弘治十四年舉鄉薦授鄆縣尹時流賊掠山東城邑及圍鄆璋親率士衆拒敵四日兵力不支城遂陷于崇熙被害璋冠帶危坐辭色慷慨賊逼之碎其襟袖卒不屈欲殺之時縣丞某求以身代義而釋之以去

杜惠

按名山藏本行記惠任丘人第進士仕同知因忤權貴棄官歸孝讓睦族四世同居父卒廬墓三年母年九十九得疾惠八十二矣尚侍疾惟謹母卒復哀毀廬墓三年至九十七歲而巳

杜鸞

按明外史杜鸞傳鸞字羽文陝西咸寧人正德末進士授大理評事嘉靖初伏闕爭大禮杖午門外長沙盜李鑑與父華劫村聚華誅鑑得脫後復行劫捕獲之席書時撫湖廣劾知府故入鑑帝遣大臣按之言鑑盜有狀帝命逮鑑至京勅法司會官覆於是鸞會御史再訊無異詞帝重違書意竟免鑑死戍遼東已復有張寅之獄鸞與刑部郎中司馬相御史高世魁司其牘桂萼等力反前獄鸞坐除名

杜桡

按萬姓統譜桡字子才臨潁人正德辛未進士歷通政使

杜輅

按山東通志輅字從殷泗水人嘉靖壬戌進士授中書舍人累至刑部郎中擢河南按察副使備兵汝南請告不出而卒爲人清姿玉立耿介絕俗精於吏職比讞平允無所阿縱嘗奉命清獄山西平反爲多薄於世味宦况蕭然清修之士也

杜文明 子槐

按明外史王欽傳嘉靖三十四年抗倭死者慈谿杜文明與子槐皆贈官文明府經歷槐光祿丞建祠並祀蔭槐子國子生槐字茂卿僦任俠縣食其父文明爲部長令團結鄉勇槐傷父老以身任之數敗倭副使劉起宗因委槐守餘姚慈谿定海遇倭定海之白沙一日戰十三合斬三十餘人賊一酋身被數槍墮馬死文明擊倭鳴鶴場斬酋一人倭驚遁稱爲將軍無何追至奉化楓樹嶺戰歿

杜桐

按明外史杜桐傳桐字來儀崑山人徙延安衛萬曆初由世蔭累官清水營守備以謀勇著遷延綏八衛遊擊將軍改古北口參將用總督梁夢龍薦延綏副總兵十四年就拜署都督僉事充總兵官起授右都督僉書後府再以總兵鎮延綏二十五年徙鎮寧夏著力免宰僧入犯桐督諸將連破之諸部長懼乞款三十年二鎮撫臣孫維城黃嘉善協謀撫之乃復貢市論功文臣自內閣以下悉進官桐以先去職但賁銀幣許復用而已久之卒於家桐自偏裨至大帥積首功一千八百時服其勇

杜松

按明外史杜桐傳桐弟松字來清有膽智勇健絕倫由舍人從軍累功爲寧夏守備萬曆二十二年卜失免掠張春井大入下馬關松偕遊擊史見李經以二千騎邀擊誤入伏中見戰死松經皆重傷松復裹創力戰寇始敗走時松已進遊擊將軍論功遷延綏參將進副總兵尋改寧夏東路松爲將廉尚氣不能容物常有所憤雄髮爲僧部議聽其歸尋起孤山副總兵三十三年擢署都督僉事鎮守延綏三十六年代李成梁鎮遼東朝議以薊遼多事特設總兵官鎮山海關以松任之四十六年張承慶戰歿詔松馳援遼陽明年楊鎬議四路出師以撫順最衝令松以六萬兵當之故總兵趙夢麟保定總兵王宣爲佐會李如柏等並進松以前鋒攻吉林崖兵敗與夢麟宣皆歿於陣

杜文煥

按明外史杜桐傳桐子文煥字燬武由蔭叙歷延綏

遊擊將軍累進參將副總兵萬曆四十三年擢署都督僉事寧夏總兵官明年鎮延綏屢敗寇安邊以疾歸天啓元年再鎮延綏坐失事罪戍邊七年起鎮寧夏詔文煥馳援俄令分鎮寧遠進右都督調守關門尋引疾去崇禎三年陝西羣盜起五鎮總兵並以勤王行總督楊鶴請令文煥署延鎮事會山西總兵王國梁擊王佳引於河曲大敗賊入據其城部議設一大將兼統山陝軍協討乃令文煥爲提督偕曹文詒馳至河曲絕饑道以困之神一元陷寧塞文煥家破遂雷文詒文煥西還四年御史吳桂給事中張承詔劾之下獄褫職十五年用總督楊文岳薦以故官討賊無功復謝病歸于弘域天啓初歷延綏副總兵七年擢總兵官鎮寧夏積資至右都督崇禎中提督池河浦口二營練兵遇賊南渡頗有功十三年移鎮浙江尋謝病去國變後文煥父子歸原籍崑山卒

杜濩

按明外史吳履傳霑化典史杜濩坐事以部民乞宥復其官

杜三策

按山東通志三策字毅齋東平人天啓壬戌進士擢給事中魏忠賢擅權亂政三策特疏糾之忠賢矯旨遣緹騎逮三策至德州忠賢伏誅還崇禎初起戶科冊封琉球卻金得使臣體歷官大理卿陞侍郎

杜能嘉

按湖廣通志能嘉臨武人事親一循古禮崇禎間邑人舉其孝蹟於巡按溫臯謨命建坊知縣徐開禧題曰孝思維則

杜邦舉

按明外史劉振之傳鄆陵典史杜邦舉富人與振之協守城陷李自成欲降之邦舉大罵遂遇害開封屬邑多陷殉難者有費曾謀魏令望柴薦禮楊一鵬王化行姚文衡之屬曾謀鉛山人少師宏裔也由鄉舉知通許賊至投井死令望字千野武鄉人舉進士授商丘知縣調太康賊破城令望闔門自焚薦禮江山人由鄉舉知洧川城陷大罵死一鵬河津人崇禎九年舉於鄉為尉氏知縣城破罵賊死化行知商水城陷被殺代者文衡蒞任數月賊復至攜印赴井死

杜姓部藝文一

杜氏祠譜序

明徐標

堯舜之道盡於孝弟有子曰孝弟也者其為仁之本與大學傳謂君子不出家而成就於國孟子曰人人親其親長其長而天下平千古之王道民風千古之人心人性也人性皆善能以仁禮存心則為法天下可傳後世聖賢幾希之統豈有異哉易云父子兄弟兄弟夫夫婦婦而家道正正家而天下定矣慨自人心不古真性澆漓機變相蒙貪殘相御人與人

相習家與家相閱惡親孝友忠信三代之遺軌哉彭城鄭集諸杜孝弟世其家如無懷氏之民人皆仰之瓜廕綿綿子孫派衍異井遷喬不無散逸恐漸以成疎矣養廉蘊璋蘊璽輩乃集族黨鳩材庀工修奉先祠歲時伏臘蒸嘗虔祀沒存昭穆秩秩有禮老者幼者貴者賤者富者貧者賢者愚者燕好一堂宛如張公藝同居九世乃以編次家乘講明聖諭勸善誠惡砥礪規瑱其君子則日進於禮讓賢智之城其小人亦不至有放辟邪侈之行故子姓雖繁出入以度不聞有犯義犯刑為宗族累者則親親長長敦所本也瞻茲芸芸者衆誰無祖先誰無親長誰心誰性不可為堯舜使天下人人心諸杜之心事諸杜之事各祀其先各親其親各長其長各存心養性以求不愧於宗族又何患天下之不平乎吾深嘉尚之額其門曰孝友世家題其譜曰三代遺風復升數言於簡首願諸杜守此勿替也

杜姓部藝文二

贈韋七贊善

唐杜甫

鄉里衣冠不乏賢杜陵韋曲未央前爾家最近魁三象時論同歸尺五天北走關山開雨雪南遊花柳塞風煙洞庭春色悲公子蝦菜忘歸范蠡船

杜姓部紀事

漢書杜周傳周子延年延年子欽字子夏目偏盲茂陵杜鄴與欽同姓字俱以材能稱京師故衣冠謂欽為旨杜子夏以相別欽惡以疾見詆適為小冠高廣財二寸由是京師更謂欽為小冠杜子夏而鄴為大冠杜子夏云

後漢書杜密傳密潁川陽城人為太僕黨事既起免歸本郡與李膺俱坐而各行相次故時人亦稱李杜焉後注前有李固杜喬故言亦也

續文獻通考晉杜坦因簡文帝稱金日磾進言曰日磾若生今世牧馬不暇安得顯用帝曰卿何量朕之薄也坦曰且以臣言之臣本中州鉅族特以渡江差後遂以儉荒見隔以此而觀日磾安得不牧馬帝悅遷為侍中

魏書胡叟傳叟安定臨涇人好屬文既善為典雅之詞又工為鄙俗之句入長安觀風化隱匿各行懼人見知時京兆韋祖思少閱墳典多蔑時輩知叟至召而見之祖思習常待叟不足叟聊與叙溫涼拂衣而出祖思固留之曰當與君論天人之際何遽而反乎叟對曰論天人者其已久矣與君相知何夸言若是也遂不坐而去至主人家賦韋杜二族一宿而成時年十有八矣其述前載無違舊美叙中世有協時事而未及鄙黷人皆奇其才畏其筆世猶傳誦之以為笑狎

唐書杜正倫傳正倫相州洹水人隋世舉秀才天下不十人而正倫一門三秀才皆高第為世欽美正倫與城南諸杜昭穆素遠求同譜不許衡之諸杜所居

號杜固世傳其地有壯氣故世衣冠正倫既執政建言鑿杜固通水以利人既鑿川流如血閱十日止自是南杜稍不振

杜審言傳審言生子閑閑生甫甫曠放不自檢好論天下大事高而不切少與李白齊名時號李杜

杜姓部雜錄

辛氏三秦記長安諺云城南韋杜去天尺五

楊炯杜袁州墓誌銘高辛之撫教萬人堯帝之平章百姓傳稱聖人之後易曰積善之家在夏爲御龍在周爲唐杜三王以降百代可知車服出於南陽衣冠集於京兆

嬾真子杜牧傳稱牧仕官不合意而從兄侔位將相快快不平卒年五十僕以杜氏家譜考之襄陽杜氏出自當陽侯預而佑蓋其後也佑生三子師損式方從郁師損三子詮倫羔式方五子憚憚憚恂伯從郁二子牧顯羣從中僚官最高而牧名最著豈以富貴聲名不可兼乎杜氏凡五房一京兆杜氏二杜陵杜氏三襄陽杜氏四洹水杜氏五濮陽杜氏而杜甫一派不在五派之中豈以其仕宦不達而諸杜不通譜系乎何家譜之見遺也唐史稱杜審言襄州襄陽人晉征南將軍預遠裔審言生閑閑生甫由此言之則甫佑同出於預而家譜不載未詳野客叢談包彈對杜撰爲甚的包拯爲臺官嚴毅不

恕朝列有過必須彈擊故言事無瑕疵者曰沒包彈杜默爲詩多不合律故言事不合格者爲杜撰世言杜撰包彈本此然又觀俗有杜田杜園之說杜之云者猶言假耳如言自釀薄酒則曰杜酒子美詩有杜酒偏勞勸之句子美之意蓋指杜康意與事適相符合有如此者此正與杜撰之說同湘山野錄載盛文肅公撰文節神道碑石參政中立急問曰誰撰盛卒曰度撰滿堂大笑文肅在杜默之前又知杜撰之說其來久矣

續文獻通考漢李固杜喬李膺杜密李雲杜衆唐李白杜甫又宋末有李韶杜範皆以廉直著名人稱李杜

欽定古今圖書集成明倫彙編氏族典

第四百十四卷目錄

魯姓部彙考

後漢書 魯恭傳

鄭樵通志 以國爲氏

廖用賢尚友錄 魯姓

魯姓部列傳

周

魯仲連

魯陽公

漢

魯謁居

魯伯

魯賜

魯翁孺

魯匡

後漢

魯恭

魯丕

魯炳

魯謙

魯奇

魯峻

魯旭

魯女生

吳

魯肅

魯淑

晉

魯芝

魯勝

魯褒

宋

魯宗之

魯軌

魯爽

陳

魯悉達

魯廣達

隋

魯世達

唐

魯吳

宋

魯宗道

魯有開

魯幹

魯嘗

魯伯能

魯文謚

魯仕能

元

魯貞

明

魯淵

魯文質

魯穆

魯崇志

魯能

魯鑑

魯昂

魯誠

魯鐸

魯邦彥

魯欽

魯世任

魯弘道

魯宗文

魯之璵

魯姓部藝文

留別魯頌

唐李白

魯姓部紀事

伍姓部彙考

鄭樵通志 以名爲氏

廖用賢尚友錄 伍姓

伍姓部列傳

周

伍參

伍舉

伍奢

伍尚

伍員

漢

伍被

後漢

伍孚

伍瓊

伍梁

晉

伍朝

伍緒之

梁

伍安賓

唐

伍正己

後晉

伍喬

宋

伍祐

伍擇之

伍誥

伍仕階

伍文仲

伍仲休

伍祀

伍典章

伍隆起

元

伍良臣

伍宗堯

明

伍洪 伍清源

伍成章 伍雲

伍鈍 伍禮

伍福 伍驥新會人 伍驥安福人

伍希閔 伍符

伍文定 伍希齊

伍全 伍箕

伍希儒 伍希周

伍餘福 伍鑑

伍令 伍典

伍民憲 伍袁萃

伍貞

古姓部彙考

鄭樵通志以次爲氏

廖用賢尚友錄古姓

古姓部列傳

周

古乘

後漢

古初

古霸

古銑

北魏

古弼

北齊

古道子

古牧 古亶

唐

古押衙

宋

古成之

古諶

元

古再思

古文

明

古朴

古彥輝

古璉

古尚德

古其然

古文炳

古宗儒

古時學

古養浩

古道行

古之奇

古革

古善之

古文龍

古文尚

古鑑

古虞

古鏞

古時偶

古之賢

古憲

古士敏

古心

氏族第四百十四卷

魯姓部彙考

後漢書

魯恭傳

魯恭字仲康扶風平陵人也其先出於魯頃公爲楚所滅遷於卞邑因氏焉

鄭樵通志

以國爲氏周同姓國

魯氏武王克商封其弟周公旦於曲阜本少昊之墟又大庭氏居之魯於其上作庫故謂大庭氏之庫其地本名魯因以命國乃作都於曲阜宋祥符中改曲阜爲仙源今隸兗州周公留相成王而使元子伯禽就封於魯錫之山川土田附庸官司典策四代之樂郊及禘與周同制伯禽之國周公戒之曰我文王子武王之弟今王之叔父我於天下亦不賤矣然我一沐三握髮一飯三吐哺猶恐失天下之士汝之魯慎無以國驕人伯禽之魯三年而報政周公曰何遲也曰變其俗革其禮喪三年然後除之太公封於齊五月而報政周公曰何速也曰吾簡其君臣禮從其俗爲也周公嘆曰魯後世其北面事齊矣不簡不易民不有近平易近民民必歸之宣公之後三家盛公室微弱昭公見逐卒於乾侯自隱公至哀公凡十二世見春秋自悼公至頃公爲楚考烈王所滅頃公逃遷於卞邑爲家人子孫以國爲氏

臣謹按魯自莊公之時齊桓公始伯爾後齊爲盟主魯共命之不暇則報政之言周公不虛也况魯自襄仲殺嫡立庶宣公之後公室微弱政在三家

昭公不反國哀公卒於有山氏可哀也哉魯起周公至頃公三十四世豈周公之澤流芳遠而微弱之漸亦由伯禽立政之所始也

廖用賢尚友錄

魯姓

魯扶風羽音又望出新蔡

魯姓部列傳

周

魯仲連

按史記魯仲連傳仲連齊人好奇偉倜儻之策而不肯仕宦任職趙孝成王時秦使白起破趙圍邯鄲魏王使客將軍新垣衍間入邯鄲因平原君謂趙王欲尊秦昭王為帝平原君猶預未決此時魯仲連適游趙見新垣衍而爭之於是新垣衍不敢復言帝秦秦將聞之為却軍五十里會魏公子無忌救趙秦軍遂引去平原君置酒以千金為魯仲連壽魯仲連辭而去終身不復見其後二十餘年燕將保聊城田單攻聊城不下魯仲連乃為書約之矢以射城中燕將乃自殺田單欲爵之魯仲連逃隱於海上曰吾與富貴而詘於人寧貧賤而輕世肆志焉

魯陽公

按尚友錄魯陽公與韓構難戰酣日暮拔戈揮之日退三舍

漢

魯謁居

按漢書張湯傳河東人李文與湯有隙湯愛史魯謁居知之使人上變告文姦事下湯論殺文湯心知謁居為之謁居病湯自往視為謁居摩足後趙王告湯大臣為史摩足疑與為大姦事湯卒以此敗

魯伯

按漢書施雠傳雠受易田王孫授琅邪魯伯伯為會稽太守授太山毛莫如少路

魯賜

按漢書申公傳申公弟子楊魯賜東海太守

魯翁孺

按漢書游俠傳太原魯翁孺雖任俠而恂恂有退讓君子之風

魯匡

按漢書王莽傳莽以盜賊多徵公孫祿與議祿言穢和魯匡設六筦以窮工商當誅莽怒扶祿出然頗采其言左遷匡五原卒正以厭民望

後漢

魯恭

按後漢書魯恭傳恭字仲康扶風平陵人也其先出於魯頃公為楚所滅遷於干邑因氏焉世吏二千石哀平間自魯而徙祖父匡王莽時為義和有權數號曰智囊父某建武初為武陵太守卒官時恭年十二弟不七歲晝夜號哭不絕聲贈無所受鄉里奇之十五居太學習魯詩太傅趙熹聞而辟之拜中牟令專以德化為理不任刑罰後拜侍御史和帝初遣竇憲擊匈奴恭上疏諫不從遷侍中數召譙見問以得

失遷樂安相徵拜議郎遷光祿勳十二年為司徒後坐事策免殤帝即位以為長樂衛尉永初元年復為司徒恭性謙退奏議依經潛有補益終不自顯故不以剛直為稱以老病策罷卒於家

魯丕

按後漢書魯恭傳恭弟丕字叔陵性沈深好學兼通五經以魯詩尚書教授為當世名儒後歸郡為督郵功曹建初元年舉賢良方正除為議郎遷新野令擢拜青州刺史元和元年徵再遷拜趙相門生就學者常百餘人永元二年遷東郡太守明年拜陳留太守十一年復徵再遷中散大夫十三年遷為侍中免末初二年詔公卿舉儒術篤學者鄧騭舉丕再遷復為侍中左中郎將卒於官

魯炳

按續漢書恭族弟弘農都尉炳

魯謙

按後漢書魯恭傳恭子謙為隴西太守有名績

魯奇

按萬姓統譜奇偏將軍南郡太守

魯峻

按萬姓統譜峻字仲嚴山陽昌邑人治魯詩顏氏春秋初舉孝廉除郎中謁者遷東郡頓丘令歷拜屯騎校尉以病遜位熹平元年卒

魯旭

按後漢書魯恭傳恭子謙謙子旭官至太僕從獻帝西入關與司徒王允同謀共誅董卓及李傕入長安旭與允俱遇害

魯女生

按陝西通志女生長樂人初餌胡麻乃絕穀凡十餘年色如桃花一日與故知別入華山

吳

魯肅

按吳志魯肅傳肅字子敬臨淮東城人也家富於財性好施與得鄉邑惟心周瑜爲居巢長將數百人過肅肅家有兩困米各三千斛指一困與周瑜瑜知其奇也遂相親結時孫策已薨權尚住吳瑜因薦肅才權見肅與語甚悅之劉表死肅請奉命弔表說劉備使撫表衆共治曹操至南郡而表子琮已降曹公備惶遽奔走欲南渡江肅徑迎之會權得曹公欲東之問與諸將議皆勸權迎之而肅獨不言權起更衣肅迫於字下勸權召周瑜任以行事曹公破走肅還權大請諸將迎肅後備詣京見權求都督荊州惟肅勸權借之周瑜病卒肅代瑜領兵拜漢昌太守轉橫江將軍建安二十二年卒

魯淑

按吳志魯肅傳肅子淑永安中爲昭武將軍都亭侯武昌督建衡中假節遷夏口督所在嚴整有方幹鳳皇二年卒子睦襲爵領兵馬

晉

魯芝

按晉書魯芝傳芝字世英扶風郡人也舉孝廉除郎中辟大司馬曹真掾真薨宣帝代焉引芝參驃騎軍事轉天水太守曹爽輔政引爲司馬屢有讒言嘉謀爽弗能納及宣帝起兵誅爽芝率餘衆犯門斬關馳

出赴爽下獄當死赦而不誅俄起爲振威將軍并州刺史以綏緝有方遷大鴻臚高貴鄉公卽位賜爵關內侯諸葛誕平進爵武進亭侯常道卿公卽位封陰平伯武帝踐阼轉鎮東將軍進爵爲侯泰始九年卒諡曰貞

魯勝

按晉書魯勝傳勝字叔時代郡人也少有才操爲佐著作郎元康初遷建康令到官著正天論表上之不報嘗歲日望氣知將來多故便稱疾去官再徵博士舉中書郎皆不就其著述爲世所稱

魯褒

按晉書魯褒傳褒字元道南陽人也好學多聞以貧素自立元康之後綱紀大壞褒傷時之貪鄙乃隱姓名而著錢神論以刺之褒不仕莫知其所終

宋

魯宗之

按宋史魯爽傳爽祖宗之字彥仁晉孝武太元末歷官至南郡太守義熙元年起義以功爲輔國將軍高祖討劉毅與宗之同會江陵進號鎮北將軍封南陽郡公宗之自以非高祖舊隸屢建大功有自疑之心遂北奔項之病卒

魯軌

按宋書魯爽傳軌一名象齒爽之父也便弓馬筋力絕人爲竟陵太守高祖定長安軌爲寧南將軍荊州刺史襄陽公鎮長社元嘉二十六年死

魯爽

按宋書魯爽傳爽小名女生扶風郡人祖宗之南陽

郡公父軌荊州刺史爽少有武藝魏主拓跋燾知之常置左右元嘉二十六年軌死爽爲荊州刺史鎮長社有七弟秀小字天念才力過爽爽與歸南上大說下詔酬叙弟姪並授官爵三十年元凶弑逆南譙王義宣起兵入討爽卽受命率部曲至襄陽事平以爽爲使持節督豫司雍秦并五州諸軍事豫州刺史爽與義宣相結已久義宣亦欲資其勇力情契甚至孝建元年義宣報爽秋當同舉爽狂酒乖謬卽日便起兵世祖遣垣護之沈慶之進軍斬首傳送京都義宣還江陵秀與共北走衆叛且盡赴水死

陳

魯悉達

按陳書魯悉達傳悉達字志通扶風郡人也祖斐齊通直散騎常侍父益之梁雲麾將軍悉達幼以孝聞起家爲梁南平嗣王中兵參軍侯景之亂悉達糾合鄉人保新蔡招集晉熙等五郡盡有其地使其弟廣達領兵隨王僧辯討侯景景平梁元帝授持節仁威將軍敬帝卽位王琳據有上流授悉達鎮北將軍高祖亦遣趙知禮授征西將軍悉達兩受之遷延顧望皆不就齊遣行臺慕容紹宗以衆來攻悉達與戰敗之紹宗僅以身免王琳連結於齊齊遣高岳助之相持歲餘會裨將梅天養等引齊軍入城悉達勒麾下濟江而歸高祖授平南將軍散騎常侍北江州刺史封彭澤縣侯世祖卽位進號安左將軍悉達雖仗氣任俠不以富貴驕人遷吳州刺史遭母憂哀毀過禮因遭疾卒諡曰孝子覽嗣

魯廣達

按陳書魯廣達傳廣達字通覽吳州刺史悉達之弟也釋褐梁邵陵王國右常侍遷平南當陽公府中兵參軍侯景之亂與兄悉達聚眾保新蔡梁元帝承制授假節壯武將軍高祖受禪授東海太守入為員外散騎常侍除假節信武將軍為吳州刺史封中宿縣侯授南豫州刺史華皎稱兵上流皎舟師疆盛莫敢進者廣達首率驍勇直衝賊軍皎平授巴州刺史太建五年入為右衛將軍八年出為北兗州刺史遷晉州刺史十年都督合霍二州諸軍事進號仁威將軍

合州刺史十年周將梁士彥將兵圍壽春詔廣達率眾擊之無功免官十二年與樊毅北討克郭默城尋授平西將軍都督郢州以上十州諸軍事後主即位入為安左將軍至德二年授安南將軍徵拜侍中改封綏越郡公尋為中領軍及賀若弼進軍鍾山廣達就執禎明三年依例入隋廣達愴本朝淪覆遺疾不治尋以憤慨卒有隊主楊孝辯時從廣達在軍中力戰陷陣其子亦隨孝辯揮刀殺隋兵十餘人力窮父子俱死

隋 魯世達

按隋書劉炫傳餘杭魯世達煬帝時為國子助教撰毛詩章句義疏四十二卷行於世

唐

魯炅

按唐書魯炅傳炅幽州薊人長七尺餘略通書史以蔭補羽林遷左武衛將軍安祿山反拜上洛太守遷南陽太守尋為山南節度使屯渚水南賊將武令珣

等擊之炅走保南陽潼關失守賊使武令珣攻之令珣死田承嗣繼往戾城中食盡被圍凡一年晝夜戰人至相食卒無救至德二載乃率眾突圍走襄陽俄拜御史大夫襄鄧十州節度使封岐國公乾元元年與九節度圍安慶緒於相州炅中流矢輒奔諸節度潰去有詔徙炅鄭陳毫節度使至新鄭聞郭子儀整軍屯穀水李光弼還太原炅羞喘仰藥死

宋

魯宗道

按宋史魯宗道傳宗道字貫之亳州譙人舉進士調海鹽令改歙州軍事判官再遷祕書丞天禧元年為右正言多所論列仁宗即位遷戶部郎中龍圖閣直學士拜參知政事貴戚用事者皆憚之目為魚頭參政因其姓且言骨鯁如魚頭也再遷尚書禮部侍郎在政府七年務抑僥倖不以名器私人卒謚肅簡

魯有開

按宋史魯有開傳有開字元翰宗道從子也好禮學通左氏春秋用宗道陰知韋城確山富弼守蔡薦之以為有古循吏風知金州有蠱獄當死者數十人有開訊之則誣天方旱秋白而雨知南康軍代還慰寧行新法王安石問江南如何曰新法行未見其患當在異日也以所對乖異出通判杭州知衛州召為膳部郎中元祐中歷知信陽軍洛滑州復守冀官至中大夫卒

魯澣

按尚友錄澣字子明清江人力學彊記尤精於易喜吟咏嘗與向子諲為詩社澣有林園二十畝場內有

含笑花數十枝自號笑塢老人

魯嘗

按尚友錄嘗海鹽人兄嘗崇軍中進士嘗與弟嘗紹興初同第進士嘗仕至太府卿自號冷齋有註杜詩十八卷其後詹子可封嘗子可宗嘗子可簡可簡子升珪皆以進士世其家可宗又中博學宏詞累官至太常卿

魯伯能

按尚友錄伯能安吉人博學彊記九歲通五經日讀萬言家貧無油夜乘月光誦讀達旦歷官處州太守生平無所嗜好惟以翰墨自娛有文集三百餘卷

魯文謐

按萬姓統譜文謐字子順性闊爽嗜書史司理高郵梳別淹獄攝丞幕府適山陽流民蟻聚撫安得所嘗置義莊義塾惠其宗人官終司理郎

魯仕能

按萬姓統譜仕能字時舉平江人淳祐甲辰進士從饒雙峰學自號寶潭任監利令應王登辟克沅州錄事兼餉事後有呂帥政貪酷沅州有叔訟姪分金者勘之得誣乃屈姪伸叔失呂帥意大怒遣使覈所掌軍餉羈沅六年呂死李應山代帥始雪之歸築居鳳棲鄉之道巖

元

魯貞

按浙江通志貞字起元衢州人元統二年舉人隱居不仕

明

魯淵

按萬姓統譜淵字道源淳安人勵志為學舉進士為華亭丞洪武初屢徵弗就學者稱岐山先生所著有春秋節傳

魯文質

按萬姓統譜文質乙未年護蹕渡江以醫道鳴洪武初授太醫院判孫宗泰洪武十九年以人材授昌平知縣

魯穆

按浙江通志穆字希文天台人永樂四年進士除御史奉職持憲體陞福建按察僉事為僉都御史穆歷仕中外二十餘年家無餘貲被服如寒士

魯崇志

按萬姓統譜崇志穆之子景泰五年進士歷應天府尹平生少嗜好於人不苟合安分自守不附勢以干進以清慎見稱

魯能

按萬姓統譜能字千之新會人景泰甲戌進士歷都御史

魯鑑

按明外史魯鑑傳鑑其先西大通人祖阿失都驛下失加明初率部落歸附太祖授為百夫長俾統所部居莊浪子失加累官莊浪衛指揮同知正統末鑑嗣父職久之擢署都指揮僉事成化四年以土兵從征賊平進署都督同知尋充左叅將分守莊浪十七年充左副總兵協守甘肅俄命充總兵官鎮守延綏孝宗立得疾致仕鑑有材勇遇敵輒冒矢石數被傷不

為阻弘治十五年疾發卒贈右都督

魯昂

按萬姓統譜昂應天人成化進士

魯誠

按萬姓統譜誠字文明山陰人成化乙未進士歷郎中

魯鐸

按明外史魯鐸傳鐸字振之景陵人弘治十五年會試第一改庶吉士授編修閉門自守不妄交武宗立使安南却其餽還國子監司業累擢南祭酒尋改北鐸屢典成均教士切實久之謝病歸嘉靖初起南祭酒踰年復請致仕累徵不起卒諡文恪

魯邦彥

按萬姓統譜邦彥字朝選睢州人嘉靖庚戌進士任行人即告病歸起原職陞光祿寺丞不出再起吏部驗封司郎中復辭屢告屢起終於恬居居家孝友恭儉躬耕樂道蕭然寒素化行里邑士林仰之

魯欽

按明外史蔡復一傳魯欽長清人萬曆中歷武安守備陝西掌印都司山西副總兵天啓元年遷神機營左副將尋擢署都督僉事充保定總兵官奢崇明安邦彥並反貴州總理杜文煥稱明年用欽代文煥命總川貴湖廣漢土軍刻期解圍未至圍已解明年羣苗蠶起欽佐王三善防剿三善敗於內莊自殺欽以殘卒還命戴罪辦賊都勻凱里土司者運道咽喉也邦彥結諸蠻困其城長官楊世蔚不能守總督蔡復一遣欽救之大敗賊兵復一上其功免其戴罪六

年邦彥復大舉入寇欽禦之河上連戰數日夜半賊直逼欽壘將士逃竄欽遂自刎

魯世任

按明外史魯世任傳世任字槐尹垣曲人性端方事親孝天啓末舉於鄉崇禎十年為鄭州知州十五年流賊來犯親勒民兵禦之河干戰敗自刎死其年賊陷襄城總督汪喬年死之知縣曹思正被殺典史趙鳳牙拒敵死訓導張信罵賊不屈死陷西華知縣劉伯驥懷印投井死明年汜水陷知縣周騰蛟亦死焉伯驥河間人由歲貢生得官騰蛟香河舉人

魯弘道

按合肥縣志弘道合肥人未樂侍御魯讓六世孫多材武膂力過人崇禎乙亥春流賊犯廬圍數匝時啓北關賊乘之登陴守者皆散弘道挺矛連斃數人賊始退至夕賊更攻東關燔其柵將入弘道復持矛抵之發銃斃賊關賴以完府縣上其忠勇題授守備

魯宗文

按明外史蔡復一傳魯欽子宗文承蔭崇禎中屢遷薊鎮副總兵為總督吳阿衡中軍十一年牆子嶺失事與阿衡並力戰死

魯之瑛

按明外史吳應箕傳南都既覆舉兵者有魯之瑛之瑛歷官副總兵駐福山蘇州既降諸生陸世綸聚眾焚城樓之瑛率千人入城戰死其時從容就義者有六合諸生馬純仁如臯布衣許德溥邳州監生王台輔

魯姓部藝文 詩

留別魯頌

唐李白

誰道泰山高下却魯連節誰云秦軍衆摧却魯連舌
獨立天地間清風灑蘭雪夫子還惆悵攻文繼前烈
錯落石上松無爲秋霜折贈言鏤寶刀千歲磨不滅

魯姓部紀事

續文獻通考有貴家女屢議姻不成夢人告曰田頭
有鹿角田尾有日炙乃汝夫也後有魯姓者求之而
諧

伍姓部彙考

鄭樵通志

以名爲氏

伍氏半姓楚大夫伍參之後也伍子胥奔吳其子又
爲王孫氏適齊漢有伍被楚人望出安定武陵又有
五氏本伍氏避仇改爲五蜀有五梁晉有始興太守
五裔

廖用賢尚友錄

伍姓

伍安定羽音又望出武陵

伍姓部列傳

周

伍參

按左傳宣公十二年楚子圍鄭晉師救鄭荀林父將
中軍先穀佐之士會將上軍卻克佐之趙朔將下軍
欒書佐之及河聞鄭既及楚平桓子欲還隨武子曰
善德刑政事典禮不易不可敵也不爲是征彘子曰
不可師遂濟楚子重將左子反將右將飲馬於河而
歸嬖人伍參欲戰令尹孫叔敖弗欲曰昔歲入陳今
茲入鄭不無事矣戰而不捷參之肉其足食乎參曰
若事之捷孫叔爲無謀矣不捷參之肉將在晉軍可
得食乎令尹南轅反旆伍參言於王曰晉之從政者
新未能行令其佐先穀剛愎不仁未肯用命其三帥
者專行不獲聽而無上衆誰適從此行也晉師必敗
王告令尹改乘輅而北之

伍舉

按左傳襄公二十六年初楚伍參與蔡太師子朝友
其子伍舉與聲子相善也伍舉娶於王子牟王子牟

爲申公而亡楚人曰伍舉實送之伍舉奔鄭將遂奔
晉聲子將如晉遇之於鄭郊班荆相與食而言復故
聲子曰子行也吾必復子及宋向戌將平晉楚聲子
通使於晉還如楚令尹子木與之語聲子曰椒舉在
晉晉人將與之縣以比叔向彼若謀害楚國豈不爲
患子木懼言諸王益其祿爵而復之聲子使椒鳴逆
之

伍奢

按史記伍子胥傳子胥父伍奢楚平王有太子名建
使伍奢爲太傅費無忌爲少傅平王使無忌爲太子
取婦於秦秦女好無忌馳歸報平王平王遂自取秦
女而更爲太子取婦無忌恐太子立殺己乃因讒太
子太子亡王遂殺奢

伍尚

按史記伍子胥傳子胥兄伍尚費無忌言於平王曰
伍奢有二子皆賢不誅且爲楚憂王使人召二子伍
尚往伍胥遂亡伍尚至楚楚并殺奢與尚

伍員

按史記伍子胥傳伍子胥者楚人也名員父伍奢兄
伍尚其先曰伍舉以直諫事楚莊王有名於楚楚平
王殺奢與尚伍胥懼奔吳說吳王僚遣公子光伐楚
公子光刺僚自立是爲吳王闔廬闔廬既得志乃與
師與伍員伐楚五戰至郢楚昭王出奔子胥掘楚平
王墓出其尸鞭之秦哀公救楚擊吳闔廬乃歸其後
伐越越勾踐擊敗吳於姑蘇傷闔廬指闔廬病創死
太子夫差立爲王敗越於夫湫越王棲於會稽之上
使大夫種厚幣請和伍子胥諫不聽王疏子胥而用

太宰駱誥與子胥有隙因譏之於王王乃使使賜伍子胥屬鏹之劍子胥自刎死吳王聞之大怒乃取子胥尸盛以鴟夷革浮之江中吳人憐之爲立祠於江上

漢

伍被

按漢書伍被傳被楚人或言其先伍子胥後也被以能稱爲淮南中郎淮南王有邪謀被數諫王怒繫被父母囚之三月被適爲之計後事發覺遂誅

後漢

伍孚

按萬姓統譜孚字德瑜靈帝時人少有大節何進辟爲侍中遷河南尹越騎校尉獻帝時董卓作亂百僚震慄孚佩刀朝服見卓語闕辭去卓送以手撫其背孚出刀刺之不中即收孚卓曰卿欲反邪乃大言曰汝乃亂國篡主何反之有罪盈惡大故來殺汝以謝天下卓遂殺孚

伍瓊

按萬姓統譜瓊城門校尉

伍梁

按萬姓統譜梁健爲人以節操見稱建興間丞相亮領益州收其所選皆妙簡舊德梁舉奏必杜微並見微用梁爲功曹轉從議郎遷諫議大夫五官中郎將

晉

伍朝

按晉書伍朝傳朝字世明武陵漢壽人也少有雅操閒居樂道不修世事性好學以博士徵不就刺史劉

弘薦爲零陵太守朝不就終於家

伍緒之

按萬姓統譜緒之奉朝請

梁

伍安賓

按萬姓統譜安賓武陵人博雅嗜學梁累降元纁之禮皆以疾辭嘗撰武陵圖記

唐

伍正己

按萬姓統譜正己字公謹寧化人大中間進士累官御史中丞時正人爲邪佞所擠者必救之朋黨漸盛禁錮名流正己遂歸田里年八十一四子泳演潛洪三子以蔭補官洪獨不肯仕隱武陵原自號抱朴居士

後晉

伍喬

按萬姓統譜喬廬江人性嗜學渡江入廬山勤學苦節自守南唐時舉進士第一命勒喬程文於石以爲永式署宣州幕府考滿遷考功郎中

宋

伍祐

按萬姓統譜祐字祐之寧化人正己曾孫大中祥符進士歷知宜城海昌以廉能稱爲文近古尤長於詩終太常博士

伍擇之

按萬姓統譜擇之字元賓寧化人祐子博洽有器識恬於進取登皇祐進士出宰長樂時諸司酷暴相矜

輒與大獄乃戚然曰以殘忍事上官非我志也即日歸故廬觴味自娛遂不復出

伍誥

按萬姓統譜誥字純甫安福人治平進士知縣事才思天成大肆厥辭祖孟軻下及司馬子長文尚雄渾一時絕倫王安石薦其文行過人起爲諸王教授性剛直寡合人多忌之故竟不大顯

伍仕階

按萬姓統譜仕階德慶州人累官奉議郎知封州秩滿即掛冠東歸悟性空門惟日訓教子孫俱以忠孝顯

伍文仲

按萬姓統譜文仲字仲成寧化人正己五世孫七歲能屬文目爲神童年十六魁鄉薦累七舉紹興年中進士應博學宏詞科

伍仲休

按萬姓統譜仲休字通遠寧化人正己五世孫博學善屬文擢大觀進士知惠州河源縣丁母憂水漿不入口毀瘠致疾終承直郎

伍祀

按萬姓統譜祀字卿材寧化人紹興進士調南安理掾治獄多所平反終宣教郎

伍典章

按萬姓統譜典章汴人失其名宋末爲翰林典章德祐二年元兵攻臨安官奔散端宗帝昀幸廣州典章者以職守扈從至厓山不去宋亡遂遁居縣之西鄉文章里

伍隆起

按萬姓統譜隆起新會人三世仕宋末隆起率義兵從帝昺於厓山與元將張弘範力戰不屈其麾下謝文子殺隆起以首降弘範宋相陸秀夫惜之刻木爲首以葬又募人執文子戮以祭墓

元

伍良臣

按萬姓統譜良臣字雲從高安人元駙馬都尉與甫之子廔視富貴致力經籍爲詩文暢達清潤壯遊京師道不諧於俗後辟爲臨江經歷八十日即棄去時元祖將屋識者謂其鳳翔千仞希縱古之明哲所著有中流一壺集

伍宗堯

按萬姓統譜宗堯清流人性資剛毅元末盜起邑人推宗堯爲長宗堯集士卒設方略以禦之四境獲安至正庚子江西寇鄧克明來侵宗堯禦之經月弗克寇使說其降宗堯乃諭衆曰吾元人死爲元鬼明日遂與其子希稷希明希周希孔率兵決死戰宗堯奮勇突入賊圍敗績父子五人俱死於難寇亦退去

明

伍洪

按明外史伍洪傳洪字伯宏安福人第洪武四年進士授績溪主簿擢上元知縣丁外艱服除以母老不復仕隱居養母十九年有異母弟得罪而逃使者捕弗獲執其母洪哭訴求代母曰汝往必死莫若吾自當之洪曰安有子在而累母者使者執以行竟死於市

伍清源

按萬姓統譜清源連城人博學善詩文洪武初辟爲訓導一時士子爭欲受業於其門嗣應明經舉授工部主事

伍成章

按萬姓統譜成章榮縣人自幼刻意誦讀六經子史多所貫穿尤長於詩書洪武甲戌舉明經分教州學士經指授者多能自達自嘉興歷他庠其教士終始懇懇無倦求樂丁亥與修大典後致仕歸壽終九十

伍雲

按明外史陳洽傳伍雲定遠人以荊州護衛指揮同知從征交趾有功調昌江衛仁宗初隨方政討黎利於茶籠鼓勇陷陣死之

伍鈍

按萬姓統譜鈍字文璉鄞縣人自幼個儻好文史才識出羣富於詞辨人多勸之仕嘗欣然志於有爲因其母陳氏不欲鈍去左右絕口不言仕進志於奉養爲事纖悉盡禮凡百所爲皆禀命而行母嘗病危篤夜禱於北辰請減己年增母壽封左右股肉煎湯藥以進病尋愈後母年八十有八臨終謂諸孫曰吾兒至孝願吾孫事之如吾兒之事吾也文璉居喪水漿不入口者數日廬墓三年茹蔬寢苦哀毀骨立未嘗少懈鄉里無不稱羨稱曰伍孝子云

伍禮

按江西通志禮字天秩臨川人父紹庸任常山教諭卒於官門弟子肖像於學宮正統初由明經仕蘇州訓導歷陞知曹州有權倖據民田六千七百餘頃特

勢陵轍居民流散體執奏之得復所侵地在官清苦自厲士民愛而懷之陞南陽府知府未至卒所著有南坡集

伍福

按萬姓統譜福字天錫禮弟正統舉人授咸寧教諭用薦歷陞陝西按察副使奉敕提學爲人風格峻整言動有法詩文典雅書法流麗俊美人推服之

伍驥

按萬姓統譜驥字弘道安福人景泰進士任御史巡按福建初入境聞盜賊充斥單騎冒險親造賊巢諭以禍福賊咸感泣歸順惟賊首李宗政負險復發遂與都指揮丁泉提兵深入泉力戰而死驥敗賊擒李宗政賊遂平驥亦以衝冒瘴癘卒敕祠祀之

伍驥

按萬姓統譜驥字惟良新會人平生爲義不奪於利積書至數千卷一時名士黎員王子倫胡濟皆與之交雖富甲鄉邑而儉朴如寒賤

伍希淵

按萬姓統譜希淵字士淵安福人天順進士成化間知廣州府爲政以通人情爲先承上接下動中肯綮興革利害雖嫌不避士民稱之終廣西右布政使

伍希閔

按萬姓統譜希閔字仲孝安福人成化乙未進士歷僉事

伍符

按萬姓統譜符字朝信安福人成化丁未進士歷都御史

伍文定

按萬姓統譜文定字時泰松滋人弘治己未進士授常州府推官尋以事免正德初復起補嘉興府同知陞知河南府轉吉安會逆濠不軌都御史王守仁與議起兵討賊領後哨逆濠就擒功次守仁歷陞副都御史提督操江雲南土賊安銓作亂陞兵部尚書往征之未至而賊平及請進兵芒部御史戴金論其好大喜功有旨班師遂致仕歸卒於家文定資兼文武豪宕不羈尚節義喜談兵法隱然有儒將風

伍希齊

按萬姓統譜希齊字仲倫安福人弘治庚戌進士歷刑部主事

伍全

按萬姓統譜全字思謹安福人正德戊辰進士歷官按察使

伍箕

按萬姓統譜箕字朝輝安福人正德辛未進士歷官按察使

伍希儒

按萬姓統譜希儒字汝貞安福人正德辛未進士歷按察司僉事

伍希周

按萬姓統譜希周字汝文安福人正德甲戌進士歷按察司僉事

伍餘福

按萬姓統譜餘福字疇中吳縣人正德丁丑進士歷知府

伍鑑

按萬姓統譜鑑字文衡晉江人嘉靖丙戌進士歷官少卿

伍令

按萬姓統譜令字思行安福人嘉靖丙辰進士任御史歷按察司僉事

伍典

按萬姓統譜典字克從祁陽人嘉靖丙辰進士歷按察司副使

伍民憲

按名山藏本行記民憲晉江人嘉靖季倭至其村民憲扶父逃避遇賊長跪乞曰勿驚吾父餘惟君欲賊不聽刃之民憲挺身殺二賊又傷數賊後隊至落其右手草中一手荷戈口喃喃呼父三日乃絕其後人時時見之烟雨中荷戈立則輒合掌呼伍孝子而過

伍袁萃

按明外史徐貞明傳伍袁萃字聖起吳縣人萬曆五年會試又二年釋褐授貴溪知縣擢兵部主事進員外郎出為浙江提學僉事歷湖廣參議廣東海北道副使請告歸所撰林居漫錄彈園雜誌

伍貞

按無為州志貞性孝友好學樂施予以產讓兄沒齒無怨倘佯衡泌蕭然高寄族人有逋負常出己財代償之著有隴耕野人集

古姓部彙考

鄭樵通志

以次為氏

古氏風俗通云古公亶父之後因氏焉言古公者猶言先公也晉平公時有舟人古乘漢有孝子古初蜀志廣漢功曹古牧後魏尚書令古弼今望出新平河內又吐奚氏改為古氏宋端拱登科古成之後有古華梅州人古亶懷安軍人
廖用賢尚友錄

古姓

古新安羽音又望出新平河內

古姓部列傳

周

古乘

按鄭樵通志晉平公時有舟人古乘

後漢

古初

按尚友錄初臨湘人光武時遭父喪未葬鄰家失火初匍匐柩上以身捍火火為之滅太守邵憚異之以為首舉